

PAULO ME LETA PILIMON BAU ME

Sebore Mene

¹ Cane Paulo, lui te nanajinige krokeciye mete cabu Keriso Yeesu me name pi, piyepu mime yepä ätrunga biname Timoti, cine te yoogärenago ai mene ne cime biname Pilimon bau me, cine cama yepä kaakesea ne lui te jewenenige. ² Yoo Pilimon, ai mene cuta ätrunga ingle biname bime bau me, lui cina labasecretnuge mäáme mete cabu piyepu cime yepä ätrunga magebi Apiya bau me cuta piyepu Arkipus bau me, lui te cine cama yepä cubu jiicenige Keriso täápume.

³ Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi meebine poode ceerame.

Pilimon me Singi piyepu Ätrunga

⁴ Pilimon, cane liba irecu lätumutanune, cane meebine ngii naajananune piyepu cäme Acejiyame ne eso yäacäranune mäáme täápume, ⁵ ingle cane itu nätecijumi, maane lipu baborage singi gäte Acejiyame me biname-wale bime täápume piyepu maane lipu Yageyame Yeesu ne jitrungenite. ⁶ Cane irecu ätumutenine, egä weene lipu alenglecäjininiye cine cama yepä ätrunga cabu, pei te pa niwenipi mine cängengarage umle äbitame iyeta miiji mule poto cidi me, lui cina saacluge Acejiyame bau ca, mine liba Keriso cabu ninajininige. ⁷ Cäme ätrunga biname, maane lipu singi gäte ätru-nga biname bime täápume, pei te cebine babo gege me piyepu ngenecu kokre me nawenenige. Maane te iyeta Acejiyame me binamewale bine ngenecu miiji me itu jaawenemepete.

Paulo Pilimon ne Jejenige Tabe Onesimus ne Cängena Acatame

⁸ Maane lipu singi gäte ätrunga biname bime täápume, peei name pi cane lui te weene cama yepä ätrunga biname gäne, cane miiji gäne meebine giri acita maane ngena wawenane, yepä cane giri lica nacitenine. ⁹ Cäme puu conocäco pisi nyene meebine giri acitame maane ngena wawenane, ingle cane Keriso me mename biname gäne piiyepu page cane age säne krokeciije mete cabu teeme name pi, yepä cane giri lica naacitenine pätä cängena naajenine, ingle cane mäáme täápume singi gäne. ¹⁰ Yoo, cane meebine naajenine Onesimus poto cidi me, lui te ätrunga cabu cäme bägrä gyene. Cane ama krokeciije mete cabu teeme täápume epu pana läbitepene babe liiyepu. ¹¹ Niinäce padare cabu tabe nuuja miiji lica ge mäáme täápume, yepä page tabe miiji gyene mäáme täápume piiyepu cäme täápume. ¹² Cane teebine mäáme bau me jityepenine piiyepu tabe cäme ngenecu naca-nenige. ¹³ Cäme singi pisi nyene tabe ama lenajame mäáme puupu ne acatame cebine ätityerame, cane liba taatu nanajenige krokeciije mete cabu Miiji Mene name pi. ¹⁴ Yepä cane singi lica gäne meebine giri acitame cebine ätityerame, pätä cäme singi pisi nyene maane mäáme singi ca ätityerame. Yoo, cane mäáme singi cäco je nuuja gwidape ne lica jewenenine Onesimus täápume.

¹⁵ Pama Onesimus naace name pi matikäli padare taatu cabu mara me läbitepi mäáme bau ca, egä tabe piba maane cama iyeteta lenajame. ¹⁶ Siige page tabe papa aletnäneji biname lica gyene, yepä tabe baborage gyene aletnäneji biname cabu ca: tabe page mäáme ngenecurage biname gyene ätrunga cabu. Tabu puu babo miijirage gyene cäme täápume, yepä tabe mäáme täápume cerämu miijirage gyene, ingle tabe mäáme aletnäneji biname gyene cuta

tabe maane cama yepä Yageyame ne jitrungenige.

¹⁷ Peei name pi maane liba cebine nacatenite, egä cane maane cama yepä kaakesea jewenenine Yageyame täöpume, maane Onesimus ne epu jewablepi, maane lipu cebine nawablute. ¹⁸ Tabe liba ngena niya itu naawenepi coo mäame bau ca nuuja gwidape itu yaacatepi, maane cebine piba najepi, cane pa naawecnistepene. ¹⁹ Cane ama cämäge ime ca yoogärenine egä: Cane Paulo te meebine pa naawecnistepene, Onesimus liba ngena ne itu yaacatepi mäame bau ca. (Yoo, nata cane nuuja singi lica gäne meebine jajime, egä maane cäme bau ca yaacatepete Keriso cabu kirece ireclota ne.) ²⁰ Peei name pi cäme yepä ätrunga biname, maane owecu nawenepi apu cabu cebine ätityerame ätrunga biname bime mule liiyepu. Maane lipu cane cama yepä ätrunga biname gäte, maane cebine gege me nawenepi.

²¹ Cane liba ai ne yoogärenine, cane umle gäne, egä cane ngena täöpume naajenine, maane jewenenite. Cuta cane umle gäne, egä maane itucärenite cane lui wawena täöpume naajenine. ²² Cane cuta nuuja gwidape täöpume meebine näätinärenine: maane puupu emacetnäjepi cäme täöpume, ingle cane cäme ngene atwana ne Acejiyame bau me becitrine, egä tabe weeme irecu ätumuta daremu jiwecnistenininige, siige cebine weeme bau me pa nawe-cnistepi.

²³ Epapras lui te cane cama krokeciye mete cabu enajenige Keriso Yeesu name pi, tabe weebibine jiwablininige. ²⁴ Cuta Mareko, Aristakus, Deemas piiyepu Luuka, lui cine cama gigri kaakesea ne jewenenisi, teepi weebibine jiwablininisi.

²⁵ Yageyame Yeesu Keriso me miiji te mäame seemo cabu lenajame.

Cane ngii Paulo. Cäme mene ngälu peese nyene.

Ireclota Mene

The New Testament in the Bine Language of Papua New Guinea

Nupela Testamen long tokples Bine long Niugini

Copyright © 1993 Bible Society of Papua New Guinea

Language: Bine

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 14 Jun 2022 from source files dated 13 Jun 2022

0b7e6c06-9d83-54ea-bc99-bd2fbdf2dfe4